

## NAQQIUT

### Akissuteqaat 7. april 2010-meersoq taarserpaa

22. april 2010

UPA 2010/37

**Piniagassanit isumalluutit siunissami nunap immikkoortuini sumiiffinnilu ataasiakkaani periarfissaasut naapertorlugit malittarisassatigut aqunneqalernissaat siunertaralugu, piniarneq aallaaniarnerlu pillugu Inatsisartut inatsisaata kiisalu nalunaarutit attuumassutillit allanngortinneqarnissaat sulissutigeqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortat Harald Bianco, Inuit Ataqatigiit & Jakob Skade, Kattusseqatigiit Partiiat)

### Akissuteqaat

(Aalisarnermut, Piniarnermut Nunalerinermullu Naalakkersuisoq)

### Siullermeerneqarnera

Inatsisartuni ilaasortat Harald Bianco, Inuit Ataqatigiit aamma Jakob Skade, Kattusseqatigiit Partiiat aalajangiiffigisassatut siunnersuummi allapput piniagassanit isumalluutit siunissami nunap immikkoortuini sumiiffinnilu ataasiakkaani periarfissaasut naapertorlugit malittarisassatigut aqunneqalernissaat siunertaralugu, piniarneq aallaaniarnerlu pillugu Inatsisartut inatsisaata kiisalu nalunaarutit attuumassutillit allanngortinneqarnissaat Naalakkersuisut sulissutigisariaqaraat.

Namminersorlutik Oqartussani kommuninilu ingerlatsinikkut allanngortitsinissap sulissutigineqarnera eqqarsaatigalugu siunnersuutip imaa soqutiginarujussuuvoq.

Tassunga tunngatillugu innersuussutigisavara piniarneq aallaaniarnerlu pillugit inatsimmi nr. 12, 29. oktober 1999-imeersumi kingornalu allannguutigisimasaani inatsimmi paragrafit 6, 7 aamma 8-mi aalajangersakkat pisortatigut ingerlanneqarnerat pisariaqartitsineq naapertorlugu kommunalbestyrelsinut pisinnaatitsineq tunniunneqarsinnaammat. Naalakkersuisut sulissutigerusuppaat piniarneq aallaaniarnerlu pillugit inatsisip pisinnaatitsissutinut tunngatillugu inatsisilerituunit peqqisaartumik misissorneqarnissaa, taakkua kommuninik aqqissueqqinnerup kingornagut ineriartornermut, aammalu naalakkersuisooqatigiinnissamut isumaqatigiissummut naleqquttuunersut nalilersinjarlugit.

Naalakkersuisut piniagassat aallaaniagassallu nunamut assigiinngitsumik agguataarsimanerarneqarnerannut, taamaattumillu piniarluni aallaaniarlunilu periarfissat nunap ilaani assigiinngitsuni assigiinngisitaarnerarlugit oqariartuuteqarnermut akerliunngillat. Taamaanneranut takussutissaavoq Naalakkersuisut Inatsisartunut 2007-imili akissutaat (Akissut UKA 2007/73 aamma 102) taamani ukiakkut ataatsimiinnermi aalajangerneqarmat timmissat pillugit soqutigisalinnik assigiinngisitaartunik inuttalimmik suleqatigiissitaliortoqassasoq – 2008-mi junimi naammassereersimasussamik - Naalakkersuisunut inassuteqaateqartussamik. Inassuteqaatip taassuma politikikkut malittaani akuersissutigineqarpoq timmiarniarneq pillugu nalunaarut nutaaq, ilaatigut Kangaatsiamiit avannamut miterniarneq ullunik 14-nik aammalu taateraarniarneq sivitsorneqarlutik.

Naalakkersuisut naalakkersuisooqatigiinnissamik isumaqatigiissutikkut aamma nunap ilaanut tunngatillugu pilersaarusionerq isummerfiginikuuvaat, tassani allassimammat:

*”Nunap angissusaata inuillu najugaqarfeqarnerisa ilusaata nassatarivai atugassarititaasut periarfissallu assigiinngitsuunerat. Naalakkersuisut kissaatigaat sumiiffinni ataasiakkaani innuttaasut nunap immikkoortuani sumiiffinnilu ataasiakkaani aaqqiissutissanik tulluuttunik pisariaqartitallu aallaavigalugit inerisaanermut peqataatinneqarnissaat”.*

Tamanna tunngavigalugu sulineq ingerlaqqissaaq aalajangiiffigisassatut siunnersuummi piniarnermi aallaaniarnermilu nalunaarutini amigaatitut tikkuartorneqartut aaqqiiviginiarlugit, aammalu piniakkanut killilersukkanut tunngatillugu.

Iliusissanut matuma siuliini taaneqartunut ilanngullugu Naalakkersuisut sulissutigerusuppaat aamma allat, soorlu naalakkersuisooqatigiinnissamik isumaqatigiissummi takuneqarsinnaasoq, ilaatigut piniartut aalisartullu ukiup ilaani piniarnikkut tunisinikkullu periarfissat ajornakusoorneranni ilinniarteqqinnissaasa, imaluunniit annertunerusumik ilinniaqqinnissaasa qularnaarneqarnissaat.

Naalakkersuisut isumaqarput piniarneq aalisarnerlu ikiliartortitsinnginnissaq tunaartaralugu ineriartortinneqartariaqartut, piniartut aalisartullu Kalaallit Nunaata imminut pilersortunngortikkiartorneqarnerani, inuussutissanut tunngatillugu, pingaarutilimmik isumalluutaallutik peqataanissaat. Inatsisit nutarterneqarnerata tamanna anguniarlugu sulissutigeqqinneqarnerani ilaatigut ikiliartortitsinnginnissamik siunertaqarneq, aammalu atugarissaarnissamut akileraartarnermullu ataatsimiititaliap inassuteqaataanni uumasunik nunap isumalluutaanik pitsaanerpaamik – taakkununga ilaallutik piniagassat – sapinngisamik pitsaanerpaamik iluaqutigineqarnissaat. Tamanna ilaatigut isumaqarpoq uumasut piniakkat timmissallu tunngaviusumik piaqqiorfiisa nalaanni piniarneqassanngitsut.

Naalakkersuisut erseqqissarusuppaat, qulaani naalakkersuisooqatigiinnissamik isumaqatigiissutikkut maani inuussutissarsiutit ineriartortinneqarnissaannik takorluukkat pineqartumi inatsisiliornikkut politikki ilusilersorneqassasoq ilaatigut Piniarneq pillugu Siunnersuisooqatigiit, KANUKOKA aammalu aalisartut piniartullu kattuffiat qanimut suleqatigalugit. Naalakkersuisooqatigiinnissamik isumaqatitigiissutip inuussutissarsiutinik nunatsinni ineriartortitsinermut tunngatillugu takorluugaa ni ilaatigut ima allassimavoq:

*”Naalakkersuisut kommunit sisamat suleqatigalugit suleqatigiinnerit pioreersut taperserumavaat, suleqatigiinnerillu nutaat aalajangersimasumut sammivillit atitunerilluunniit pilersinnissaannut peqataassallutik”.*

Taamatut ilisimasamik avitseqatigiinnissamut atugassatut oqaatigineqarsinnaavoq Naalakkersuisoqarfik Pinngortitaleriffik aamma Pinngortitamut Avatangiisinullu Naalakkersuisoqarfik KNAPK-lu suleqatigalugit suleqatigiissitamik nalunaarsuisussamik pilersitsissammat, uumasut assigiinngitsut ingerlaartarnerannut aammalu atuisut malugisimasaat, soorlu najukkani ataasiakkaani piniakkat najortagaanni iluaquteqarnerup annertusineqarnissaanik siunertaqartumik.

Naalakkersuisut isumaqataapput malittarisassat najukkani pissutsinut naleqqussarneqarnissaannut oqarnermut. Nunami isumalluutinik nakkutilliinissamullu killilimmik periarfissalimmi innuttaasut malittarisassanik akuersornissaat aammalu malittarisassat najukkani pissutsinut naleqquttuunissaat pingaarluinnarpoq.

Naalakkersuisut qulaani pineqartut tunngavigalugit siunnersuut ilalerniarpaat suliarlu 2011-p ingerlanerani uterfigeqqikkumaarlugu.

Taamaalillunga siunnersuut Inatsisartuni ingerlateqqitassanngortippara.